

本草彙言

本草彙言卷之七

錢塘

倪朱謨純字甫選集男倪洙龍冲之氏藏稿

沈 瑄西輿甫校正

草部

水草類

澤瀉味甘淡氣寒無毒陰中微陽降也入足太陽少陰經

陶氏曰澤瀉生汝南池澤蘇氏又言今汝南不復采惟以澤州華州者為善今山東河陝江淮閩浙亦有之總不若漢中南鄭青州代州者形大而長尾間必有兩歧者為勝春生苗叢生淺水中葉似牛舌獨莖直長秋開白花多叢似穀精草秋末采根曝乾但易朽爛須密藏為佳

○澤瀉宣行水道之藥也此藥寒淡下行以疎滲利竅為

事故前古統治一切水病專通利下焦去胞中之垢消

蓄積之水凡濕熱黃疸四肢水腫寒濕脚氣陰汗濕痒

小便癃閉淋瀝白濁或心忪悸動奔豚疝瘕如上中下  
三焦停水之證並皆治之如患人無水濕病而陰虛腎  
氣衰微陽虛血氣不足以致眩暈目昏耳鳴耳聾怔忡  
驚悸煩渴腫滿諸疾法咸禁用

方龍潭先生曰澤瀉其味甘淡微鹹有固腎治水之功  
然與猪苓所治則一而所用又有不同者蓋猪苓利水  
能分洩表間之邪澤瀉利水能宣通內藏之濕但此劑  
入腎經能瀉膀胱邪氣故八味丸腎氣丸用此不惟接  
引諸藥入腎經亦可運地黃茯苓山藥之滯古人用補  
藥必兼瀉邪邪去則補藥得力一闔一開此乃玄機妙  
理此劑性善分洩長于宣行水道故張仲景治雜病心

下有支飲。苦目。有澤瀉湯治傷寒有大小澤瀉湯。五苓散輩皆用澤瀉。行利停水爲最要藥。無水濕疾者。悞服病人眼。蓋目爲水。而司膀胱腎藏者也。過于分利。則膀胱之水涸而火生矣。故曰病眼若腎水不足者。用補益之劑。以此少佐可也。又按經云。久服明目。扁鵲又云。多服昏目。何也。若脾中有留垢伏水。濕痰濕氣者。服澤瀉以淨膀胱濕邪。故利小便而明目也。若腎氣衰乏。上無留水下無留濕。悞服澤瀉以瀉腎氣。故多服昏目也。又陶氏言澤瀉根葉及實。強陰氣。久服令人有子。日華子言善催生。通女人血海。令人無子。旣云強陰。何以令人無子。旣云催生。何以令人有子。蓋澤瀉同補藥。能逐下

焦濕熱邪氣濕熱既去陰強海淨謂之有子可也。若久服則腎氣太洩血海反寒謂之無子可也。諸藥皆然。學者當類而推之可矣。

陳和士先生曰。農皇經言澤瀉治風寒濕痺養五臟益氣力肥健。久服耳目聰明等語。總在風寒濕痺四字直貫。此藥行水去濕痺痛自安。痺痛安則四體和氣力益而身肥健也。身有風寒濕邪則清陽不升必有頭重目昏耳鳴耳聾之證見焉。此藥水行濕去則土氣得令清陽上行天氣明爽耳自聰目自明矣。若非風寒濕邪誤用爲病反甚。

○集方治切停飲停水。用澤瀉五錢。人參白朮半夏茯苓

苓。陳皮。紫蘇。猪苓。各三錢。爲治飲無不効。○治水腫。晝  
劇夜下者。陽水也。用澤瀉。猪苓。白茯苓。人參。白朮。白芍  
藥。赤小豆。桑白皮。陳皮。多服必愈。治水腫夜劇晝平者。  
陰水也。用澤瀉。車前子。赤茯苓。生地黃。白芍藥。赤小豆。  
桑白皮。木瓜。石斛。革薢。薏苡仁。多服必愈。分兩各等。○  
治陰胞不淨。爲淋。爲濁。爲帶。諸垢穢宿疾。用澤瀉。一兩。  
瞿麥。猪苓。各五錢。滑石。三錢。甘草。一錢。燈心。五十枚。水  
煎。和生白菓肉汁。半盞服。如無白菓汁。生白蘿蔔汁。亦  
可。○治膀胱不清。水蓄不利。用澤瀉。一兩。猪苓。五錢。滑  
石。一錢。肉桂。木香。各五分水煎服。○治濕熱黃疸。面目  
身黃。用澤瀉。茵陳。各一兩。滑石。三錢。水煎服。○治四肢

水腫方見前陽水陰水。○治寒濕脚氣有寒熱者用澤  
瀉木瓜柴胡蒼朮猪苓木通草薢各五錢水煎服。○治  
陰汗濕痒腎囊風疾用澤瀉一兩小茴香蒼朮各五錢  
水煎服。○治小便癃閉或淋瀝或白濁用澤瀉猪苓車  
前子瞿麥甘草白茯苓川黃柏各三錢水煎臨服時加  
海金沙一錢調服。○治水濕凌心心忡悸動用澤瀉猪  
苓各五錢半夏三錢白朮二錢水煎服。○治水濕不行  
陰道無陽氣轉運致成奔豚寒疝用澤瀉五錢小茴香  
橘核吳茱萸桂枝各三錢青皮一錢水煎冷服。○治心  
下支飲用澤瀉五兩蒼朮俱米泔浸一日炒各一兩  
水二升煎半升溫服。○治水痞渴煩小便不利或吐或

瀉以澤瀉。兩。猪苓五錢。白朮茯苓各三錢。肉桂一錢五分。水煎服。○治陰虛有濕熱者。用澤瀉爲君。鹽水炒。配入六味地黃丸中。

○倪朱謨曰。澤瀉利水之主藥。利水人皆知之矣。丹溪又謂能利膀胱包絡之火。膀胱包絡有火病。癰閉結脹者。火瀉則水行。利水則火降矣。水火二義並行不悖。

羊蹄根味苦氣寒無毒

別錄曰羊蹄生陳留川澤所在亦有今江南江北近水  
濕地極多韓氏曰春生苗高三四尺莖節紫赤葉長尺  
許狀如牛舌及蒿苣葉而青碧入夏起莖開花青白成  
穗結實有三稜夏至而枯秋深卽生根長尺許赤黃色  
似大黃及牛旁劫蘿同輩○  
詩小雅云言采其蓬節也

○羊蹄根殺蟲去癰涼血解蠱之藥也按本經主女子陰  
蝕除禿瘡頑癬乾疥諸疾用米醋磨塗卽消又寇氏方  
搗汁吐蟲毒并治產後風秘或熬膏或作丸服散熱鬱  
吐血止赤白雜痢每稱爲奇方也但苦寒而腥如脾胃  
虛寒洩瀉不食者切勿入口

集方治女人陰蝕疼痛用羊蹄根煎湯搽洗○治白禿  
瘡用羊蹄根搗爛蘸米醋擦之○治經年頑癬久不愈

同○治蠱毒方用羊蹄根搗汁飲卽吐出○治產後風秘方不通用羊蹄根搗汁飲卽通○治熱鬱吐血方用羊蹄根和麥門冬煎湯飲或熬膏煉蜜收白湯調服數匙○治赤白雜色痢疾方用羊蹄根煎湯飲或作丸服亦可○治面生紫塊如錢方或滿面皆有用羊蹄根生薑各四兩取汁穿山甲十片燒存性川椒五錢炒俱爲末用生絹包擦如乾入醋少許潤濕擦數次累効



搗汁入酒中。驅蛇蟲毒。今以端陽節。俱食用者。不入藥用。○蒙釜曰。救生石澗。而葉細嫩者。名菖蒲。根小節密。味甚辛烈。堪收藥用。能通竅開心。志者也。種池塘而葉粗長者。名菖陽。根大節疎。味兼苦淡。惟取作餞饌酒點茶者也。故古方中。但用此味。特加石字于上。示其所優。使人之不誤取也。

○石菖蒲能通心氣。開腎氣。溫肺氣。達肝氣。快脾氣。通透

五藏六府。十二經。十五絡之藥也。故本草主欬逆上氣。

肺人事昏迷。心兩腰沉滯。腎悲怒氣逆。肝肚腹飽脹。水

土不和。脾等證。又治一切風疾。如手足頑痺。癱瘓不遂。

服之即健。一切時行瘟疫。如瘴瘧毒痢。噤口不食。服之

即安。一切氣閉。如音聲不清。耳竅不利。并喉脹乳蛾。服

之即通。大抵此劑。辛則上升。而苦則下降。香則通竅。而

溫則流行。可以散風。可以溫寒。可以去濕。可以行水。可

以和血也。如農皇言補五藏通九竅延年益智者。單指巖棲修煉之士。辟穀服餌之用。以其助發陽氣。辟除陰嵐。兼可參合養性諸藥。如人參黃精玉竹地黃天麥。冬之屬。資其宣導。臻乎太和。故亦爲仙經要藥。至于世俗之人。五慾熾然。六淫迭至。詎可窮年卒歲久服偏燥之物乎。故陰虛火炎吐血咳嗽之人。切勿與也。

繆仲醇先生曰。陽精芳草。辛溫四達。逐百邪。散邪結。壅遏既徹。九竅應之而通。仙家服食藥之上品。上生者也。王紹隆先生曰。菖蒲得道種智。不似人心。隨境卽變。清心寡欲人餌之。莫不仙去。可比琴瑟妙音。指發。

○集方治效。逆上氣。因氣道阻塞者。用石菖蒲三錢。木香

一錢共爲末。白湯調服。○治中風中痰中氣中暑中食  
人事昏迷語言不出者。用石菖蒲。膽南星。各三錢。爲末。  
中風防風秦艽湯下。中痰白芥子。製半夏湯下。中氣白  
朮。木香湯下。中暑川連。薄荷湯下。中食枳實。厚朴湯下。  
○治兩腰沉滯重強不能俛仰。用石菖蒲。石斛。革薺。各  
等分。水煎服。○治積怒傷肝。憤悲成疾。用石菖蒲。一兩。  
紅花。五錢。共爲末。每服三錢。白湯調下。○治脾氣不和  
肚腹飽脹。用石菖蒲。一兩。白朮。厚朴。各五錢。甘草。四錢。  
俱炒燥爲末。水發丸。每服三錢。燈心湯引。○治手足頑  
痺癱瘓不仁。用石菖蒲。四兩。枸杞子。八兩。白朮。五兩。共  
爲末。煉蜜丸。每服五錢。白湯送下。○治時疫瘴癘傳染

用石菖蒲一兩。茵陳二兩。川連三錢。薑皮五錢。共爲末。每服二錢。白湯調下。○治噤口惡痢粒米不入者。用石菖蒲一兩。川黃連甘草五穀蟲各三錢。爲末。蜜湯調送少許。

續補集方

夏禹臣方

治三十六種風。不治者。用石菖蒲三觔。薄切。

日乾。好酒一斛。以絹袋盛。浸酒中。密封百日。視之如菜色。再以熟黍米五升。納中。封十四日。取出。日飲。無不效。驗。并治癰癩風疾。○治尸厥。斃死。但痛。嚙其踵跟。及足。搯趾甲際。卽甦。或再用石菖蒲搗汁灌之。或用乾者研末。白湯調灌亦可。○治卒中客忤。用石菖蒲搗汁灌之。○治胎動不安。或

腰痛胎轉搶心。或日月未足而欲產。並以石菖蒲根搗  
汁溫飲。○治耳卒聾閉。用石菖蒲一寸。蓖麻仁一粒。去  
殼同搗作七丸。綿裹一丸塞耳。日一換。

倪朱謨曰。石菖蒲利氣通竅。如因痰火二邪爲肯。致氣  
不順。竅不通者。服之宜然。若中氣不充。精神內餒。氣竅  
無陽氣爲之運動。而不通者。屢見用十全大補湯奏功。  
極多。石菖蒲不必問也。

香蒲味甘氣平無毒

李氏曰香蒲生南海池澤今處處有之。又以秦州者為良。春初叢生水際。嫩葉出水時紅白色。非然似莞而福有脊而柔。取其中心白弱大如匕柄者。生啖之。甘脆美。日又湯瀹作羹食。或煉食。蒸食。醋浸食。或曝乾磨粉作餅食。皆可。詩云其藁伊何。惟筍及蒲是矣。又周禮謂之俎。蒲今人罕有食之者。至夏抽梗。丁叢葉中。花抱梗端。如武上莽荏。故俗謂之蒲荏。即蒲葦也。其花中蘊屑。即蒲黃也。四月欲開時。以之。

○香蒲潤燥涼血去脾胃伏火之藥也。東垣主五藏邪熱。

故汪氏方生啖止消渴吐衄鮮血。寧氏方搗汁飲治勞熱煩躁。又利小便。今方藥中不復用。人無采者。南海人亦不識。因蒲黃出于此中。今備此以廣取用云。

其宗皇帝賜王司馬有治李太醫方

治關格上下不通。膈中覺有所礙。欲升不升。欲降不降。升降不行。飲食不下。大便不出。書云。關者甚熱之氣。垢物無由而出。熱在下焦。壅塞不便也。格者甚寒之氣。水穀無由而入。寒在胸中。遏絕不進也。用真香蒲末一兩。半夏麴六錢。川貝母五錢。蘇子四錢。茯苓三錢。白朮二錢。枳實沉香各一錢。俱為極細末。如關病大便閉塞不便。本方加酒煮九蒸九晒。大黃一兩。砂仁五錢。共為末。煉蜜丸。如黍米大。每空心服二錢。豆腐漿送下。如格病飲食不入。本方加肉桂一兩。附子童便製五錢。白豆仁四錢。共為末。煉蜜丸。彈子大。噉口內。隨津唾徐徐嚥下。

蒲黃味甘。氣平。無毒。

雷氏曰。蒲黃。卽香蒲。花上黃粉是也。一名蒲灰。開時便取。蜜搜作果食之。甘潤而美。其葉七八月摘取。柔滑而溫。可以爲席。爲扇。書禮二經。言男執蒲篲。卽取此像。言有奠安君人之道之意。外有松黃。及黃蒿二物。全似蒲黃。只是味粗惡。及吐人。務要辨明。取真者。須微炒令黃色用。

○蒲黃。血分行止之藥也。主諸家失血。凡吐血。衄血。溺血。便血。崩漏下血。腸風瀉血。總能治之。此藥性涼而利。能潔膀胱之原。清小腸之氣。故小便不通。前人所必用也。至于治血之方。血之上者可清。血之下者可利。血之滯者可行。血之行者可止。凡生用則性涼。行血而兼消炒用則味澀。調血而且止也。

○集方治吐血。衄血。不拘男婦老幼。用蒲黃末。微炒。每服

三錢。白湯調送。○治小便溺血。血淋。大便腸風漏血。用

生蒲黃微炒。每空心服三錢。生地黄煎汁調服。○治婦

人血崩經漏。用蒲黃炒焦。當歸。川芎。熟地。牡丹皮。各二

錢。煎湯調服。○治小便不通。用生蒲黃。海金沙。各等分。

白湯調服。早晚各二錢。○治心腹<sub>大氏方</sub>痛。用蒲黃。五靈脂。各

等分。白湯調送二錢。○治小便轉胞。以布包蒲黃。裹兩

腰間。令頭致地。數次。卽通。○治痔瘡出血不止。用蒲黃

末三錢。白湯調。日三服。○治難產<sub>保氏方</sub>催生。用蒲黃。地龍。洗

淨。焙。陳皮。各等分。俱炒爲末。每服三錢。白湯調下。立產

○治產後<sub>產文方</sub>下血幾死。用蒲黃炒黑。二兩。水二升。煎八合

服。○治產後<sub>司前</sub>兒枕并血瘕。用蒲黃三錢。米飲調服。○治

產後煩悶。用蒲黃三錢。白湯調服。極良。○治耳中出血。用蒲黃炒黑。研末。摻入。

蒲萇。卽蒲黃中篩出赤滓。治瀉血。血痢。炒黑用。瀉腸甚妙。

菝舘。又名菝舘。味甘淡。氣冷。性滑。無毒。

韓氏曰。菝舘。生湖田陂澤中。二月生。白葉。葉如蔗。中抽心。潔白如小兒臂。久則根盤而厚。生熟皆可啖。甘滑而利。歲有二刈。惟秋中結臂內有黑灰。色人食之。終不如春月白嫩。汁美也。

○菝舘潤大腸。疎結熱之藥也。甘滑冷利。孟氏方主五藏熱結。止消渴。除疸黃。解酒毒。化丹石毒發。誠爲專劑。如脾胃虛冷。作瀉之人。勿食。

萹，味甘，氣寒，無毒。

李氏曰：萹，葉似烏菹，生南方，潤澤也。惟吳越人善食之。葉如荇菜而差圓，形似馬蹄，其莖紫色，大如筋，柔滑可羹。夏月開黃色花，結實青紫色，大如棠梨，中有細子，莖之短長，隨水淺深，春夏嫩莖，未葉者，名推萹，葉稍長者，名絲萹，其莖如絲也。至秋老，則名豬萹，僅可飼豬也。

○萹菜，涼胃療疸，散熱痺，解丹石藥毒之藥也。此草性冷而滑，和薑醋作羹食，大清胃火，消酒積，止暑熱成痢，但不宜多食，久食恐發冷氣，困脾胃，亦能損人。

水萍味酸苦氣寒無毒

陳氏曰水萍有三種大者曰蘋葉圓潤寸許中者曰荇葉似圓有缺小者即滿渠池塘中所生本草所用即此也○李氏曰季春始生一葉經宿即生數葉葉下微髮即其根也面青背紫者入藥最良而紫背綠者不堪入藥七月收取置竹篩內下以水映之日晒方乾

○水萍發汗驅風下水氣化丹毒之藥也此專得寒水清

陰之氣以生夏天清陽之氣以長體輕性燥善去皮膚

濕熱風疹又作湯沐浴生長毛髮他如風濕痿痺癰瘰

不起者癰風惡毒筋骨頹敗者用此屢建奇功又如水

腫因熱鬱小便閉結為患者用此亦無不愈也但性燥

氣寒善于發汗力勝麻黃下水功同通草如表氣虛而

自汗出者勿用

前賢朱丹溪曰。浮萍發汗。勝于麻黃。俗醫用治時行熱疾。無汗者。大有功效。其方用四月中初出浮萍。晒乾。一兩。麻黃去根節五錢。甘草二錢。共研細末。每用二錢。葱頭湯乘熱調服。汗出乃瘥。

李蘋湖先生曰。浮萍其性輕浮。入肺經。達皮膚。所以能發揚邪汗也。世傳以紫背浮萍。晒乾爲細末。煉蜜和丸。彈子大。每服一二丸。以豆淋酒化下。治左癱右瘓。三十六種風。及偏正頭風。口眼喎斜。大麻癩風。一切無名風毒。及脚氣。并水腫便秘。或打撲傷損。與胎孕有傷諸證。服過百丸。卽爲全人。

蘇氏治癘風惡疾。遍身者。用紫背浮萍。濃煎汁。屢浴之。

海藻味苦鹹氣寒有小毒氣味俱厚純陰之品沉也。

別錄曰海藻生東海池澤蘇氏曰今登萊諸州及近海諸地皆有之葉類萍藻莖如亂髮而黑根著水底石上有大小二種大者名大葉藻生深水中葉大如水藻小者名馬尾藻生淺水中宛如馬尾海人以繩繫腰投水取之五月後不可取恐有大魚出水傷人也修治以淡水浸去鹹味晒乾用○陳氏曰海藻生海中若燕濯然其各狀有四一日藻海中之水藻也一口羅水草之有文也一口綸生淺水而葉細一口組生深水而葉大爾雅云綸似綸組似組東海有之正謂此二藻也

○海藻散癭氣消癰腫化癥瘕下水腫之藥也此藥治癭核馬刀諸瘡堅而不潰潰而不斂者鹹能軟堅寒能泄熱如營氣不調外為癰腫隨各引經藥配之腫無不消又李氏方兼治水腫腳氣留飲結痰之濕熱使邪氣從小便中出取鹹入腎達膀胱有潤下分消之意如脾虛

胃弱血氣兩虧者勿用之

東垣老人曰此藥反甘草古方治瘰癧用海藻甘草兩用之蓋以堅結之病非平和之藥所能取捷必令反奪以成其功也

○集方治瘰癧

此方

用海藻八兩絹袋盛之以清酒二升浸之

春二夏三秋四冬五日每服二合日三服酒盡再作其

渣晒乾爲末每服二錢白湯調日三服不過兩劑愈○

治瘰癧

此方

左右交接者以海藻菜用蕎麥麴拌炒直白殭

蠶炒各等分爲末米糊爲丸如梧子大每食後服百丸

白湯下

昆布。味鹹。氣寒。性滑。無毒。

李氏曰。昆布又名綸布。生東南海中。葉如手大。紫色。采  
可食。其細葉者。卽海藻也。又一說。昆布生登萊者。葉  
細。樣如繩索之狀。出閩浙者。葉大似菜。蓋海中諸菜性  
味相近。主療一致。海藻昆布雖稍有不同。亦無大異也。  
修治。以水煮半日。待  
鹹味去。可晒焙用。

○昆布去頑痰。利結氣。消癭瘰之藥也。別錄方。又治十二  
種水腫。并陰癰疔痕諸疾。總不過爲消痰下氣故也。古  
方噎隔證。恒用之。亦取此意。但此性雄于海藻。不可多  
服。令人瘦削。

東垣老人曰。鹹能軟堅。故癭腫堅如石者。非此不除。與  
海藻同功。二物下氣消痰殊捷。久服又能損人。無此疾  
者。不可服食。

之至重言  
○集方治膀胱結氣脹壅不行類多疝證用高麗昆布一  
觔以米泔水浸去鹹味再洗淨以水一斛煮熟再切細  
更水煮極爛乃下醬油薑椒葱白等味調和過飯食極  
能下氣海藻亦可依此法製食之○治項下五種瘰癧氣  
結核癰癭腫硬以昆布海藻各一兩浸洗去鹹味晒乾  
爲末醋和爲丸彈子大時時含之嚥汁味盡再易其患  
漸消

海帶味鹹氣寒無毒

劉氏曰海帶生東海水中石上似海藻而粗柔  
勃而長今登萊人晒乾以束器用可代繩索  
○海帶去鹽行水下氣化痰功同海藻昆布及婦人方中  
用此催生有驗稍有異耳

草部 藤草類

忍冬藤味甘氣溫無毒。

李氏曰：忍冬藤生凌冬不凋，故名。在處有之。藤蔓左纏繞覆草木上，或籬落間莖色微紫，葉對節生，似薜荔而青，有滴毛。三四月開花，長寸許，垂鬚，一蒂二花，兩瓣，大小不齊。若半朵狀。初開蕊瓣俱白，經三日漸變黃色。新舊交參，黃白相映，氣甚芬芳。燥濕不變，花名金銀花。藤名鴛鴦藤。四月采花陰乾，惟采藤葉不拘時日。

○忍冬藤葉花根功用相同，驅風除濕，散熱療痺，消癰止

痢之藥也。此藥清虛振肅，不寒不燥，補而不滯，利而不滑。凡病風濕火邪，筋脉受患者，服之効驗更速。故史氏方稱治痺痛，并手氣脚氣，甚捷。而後世外科癰瘍諸證，未成可散，能施拔毒之功，已成可潰，大有回生之力。始終必用要劑，則後方又治飛尸、遁尸、風尸、沉尸、尸注及

鬼擊客忤諸疾者取其甘溫忍冬乃得震陽振肅之意不特解毒祛風更有鎮安神藏者也

⑤集方治風毒濕毒熱毒或痒或痛或腫或木或堅硬或破爛不拘遍身胸腹背臂手足等處用忍冬藤葉花根

一觔上茯苓一觔俱切碎煎湯逐日飲之其毒漸減○

治痺痛手足不隨用前方日服有驗○治癰疽發背不

問發在何處發眉發頤或頭或項或背或腰或脇或乳

或手足上下兩腕之間皆有奇功如鄉落僻陋之處或

貧乏失業之人藥食難得者但渡心服之其効甚妙用

忍冬藤生取一握搗爛用生酒少許調稀稠得所塗于

毒四圍中留一孔令洩氣再用藤五兩搗爛用大升草

一兩同入砂瓶內以水二大盃文武火慢煎至一盃入無灰酒一盃再煎十數沸去渣分爲三服一日一夜喫盡病勢重者一日二劑服至大小便通利則藥力到矣  
○治熱毒血痢用忍冬藤濃煎飲○治久年脚氣作痛筋骨引疼用忍冬藤葉日乾爲末每服二錢熱酒下○  
治五種尸注飛尸者遊走皮膚通連藏府每發刺痛變動不常也遁尸者附骨入肉攻鑿血脉每發不時見死尸聞哀哭便作也風尸者淫躍四末不知痛之所在每發恍惚得風雨便作也沉尸者纏結藏府中引心脇每發絞切遇寒冷便作也尸注者舉身沉重精神錯雜管覺昏廢每節氣至便大作也以上諸證並是身中尸鬼

引接外邪。宜用忍冬莖葉剉碎。水煎濃汁。每用溫酒化  
下半盞。一日二服。○治諸般腫毒。金刀傷瘡。一切惡瘡。  
用金銀藤八兩。吸鉄石三錢。香油一觔。熬枯去渣。入黃  
丹八兩。待熬至滴水成珠。用軟油紙攤貼。○治無名奇  
怪惡瘡。久不愈。用金銀藤一把。搗爛入雄黃一錢。水二  
升。瓦礮煎之。以紙封七重。穿一孔。待氣出。取藥礮以瘡  
對孔薰之。藥汁冷。再熨熱薰。半日。久火出黃水。後用生  
肌末藥。卽効。

種痘方。用忍冬藤晒乾爲末。每晚服一錢。砂糖湯調服。  
日日服之。服二年。小兒永無痘瘍之夭。

鈎藤味苦微甘氣平無毒入手足厥陰經藥也。

陶氏曰鈎藤又名牛藤。僅療小兒。不入餘方。寇氏曰出建平。秦中湖南湖北江南江西山中皆有之。李氏曰狀似葡萄藤。長八九尺。或一二丈。大如拇指。其中空。致酒壺中。以氣吸之。涓涓不斷。壺間有刺。宛如鈎鈎。色紫黑。古方多用皮。今方多用鈎。取其力銳耳。

○鈎藤祛風化痰定驚癇安客忤攻痘瘡之藥也。此藥入

手足厥陰二經。手厥陰主火。足厥陰主風。小兒諸病皆

肝風相火為患。故本草獨治小兒寒熱驚癇。手足痰癰。

口眼牽動。凡胎風客忤。天弓急疾。幼科十二種驚風之

證。用此通心胞肝膽三經。使風靜火息。則諸證自除矣。

錢仲陽先生曰。鈎藤溫平無毒。嬰科珍之。其體鋒銳。其

性捷利。祛風痰開氣閉。安驚癇于倉忙頃刻之際。同麻

桂發內伏之寒同茶連解酷烈之暑同前葛祗在表之邪同查利消久滯之食同鼠粘桔梗羌防紫草茸發痘瘡之隱約不現也祛風邪而不燥至中至和之品但久煎便無力俟他藥煎熟十餘沸投入即起頗得力也去梗純用嫩鈎功力十倍

白花藤味苦微甘氣寒無毒

蘇氏曰白花藤生嶺南交州廣州平澤處蔓生苗似野葛葉似女貞莖葉俱無毛開白色花其根似葛而骨柔皮厚肉白一說葉有細毛狀似牡丹凡使藥苗皆可用又一種菜花藤真相似但味酸澆可別耳

○白花藤解諸藥飲食中毒煮濃汁立解

本草

甘藤汁味甘。氣平。無毒。

陳元口甘藤生江南山谷其藤大長丈餘莖三四寸如木防已所斷次之氣出一頭其汁甘美如蜜。

○甘藤汁解諸熱止煩渴之藥也。陳氏方主調中益氣利五藏者。特熱勝陰虛水枯血燥為病相宜也。若胃虛有寒者不可用。

黃藤味甘微苦。氣寒。無毒。

李氏曰黃藤生嶺南狀若防已。土人常服此藤。縱飲食中有毒飲此汁亦自然暗解。亦利小便不通。

含水藤中水味甘氣寒無毒

又名大楓藤

李氏曰含水藤生嶺南及北海邊山谷中又安南朱厓  
籍耳無水處皆種此藤藤狀大如瓠葉若葛葉實似枸  
杞斷藤取汁飲之甚清美其藤去地一丈斷之更  
生其水不絕山行口渴斷取飲之實天資之藥也

○含水藤中水去煩渴定心躁清瘴癘解丹石火藥之藥  
也外夷方士往往治天行熱疫狂亂癰癩并療暑瘴暑  
痢通小便癰閉便濁諸證

天仙藤味苦氣溫無毒

蘇氏曰天仙藤生江淮及浙東山中春生苗蔓作藤葉似葛葉圓而小有白毛四時不凋根有鬚夏月採取其根苗南人多用之

○天仙藤流氣活血治一切諸痛之藥也人身之氣順則

和平逆則痛悶作矣如楊氏直指方天仙藤治痰注臂

痛氣留疝痛癰聚奔豚腹痛產後血氣腹痛他如妊娠

水腫面浮氣促男子風勞久嗽不愈久嗽數年不愈起居自如身無恙者

名曰風勞悉以此藥治之無不寢安蓋謂其善于流行

血氣故也如諸病屬虛損者勿用

○集方治痰注臂痛用天仙藤白朮羌活各三錢蔓黃五

錢防風二錢水煎服○治諸般疝氣用天仙藤一兩好

酒一椀。水一椀。煮六分。溫和服。○治癥瘕積聚及奔豚  
疝氣諸疾。用天仙藤一兩。炒。乳香。沒藥。玄胡索。醋炒。吳  
萸。乾薑。各二錢。小茴香。五錢。共爲末。每服三錢。好酒調  
服。○治產後兒枕腹痛。用天仙藤一兩。炒焦。玄胡索。山  
查肉。俱醋炒。各五錢。共爲末。每服四錢。沙糖酒調服。○  
治妊娠水腫。始自兩足。漸至喘悶。足趾出水。不可作水  
治。用天仙藤。炒。香附。陳皮。烏藥。各一錢。甘草。五分。木瓜。  
紫蘇葉。各一錢。五分。水煎服。小便利。氣脉通。腫漸消。不  
須多服。○治風勞久嗽。用天仙子。四兩。北細辛。三錢。黃  
耆。防風。桑皮。各二錢。分作十劑。水煎服。

清風藤味氣缺 又名青藤

蘇氏曰清風藤生台州天台山中其  
苗蔓延木上四時常青土人采葉用

○清風藤散風寒濕痺之藥也圖經方治風濕流注腫毒

延生及歷節鶴膝痛風攣縮麻痺癱瘓諸疾使酒浸飲

能舒筋活血正骨利髓故風病軟弱無力并勁強偏廢

之證久服常服大建奇功須與當歸枸杞合用方善也

○集方治風濕痺痛用清風藤根三兩漢防已一兩切碎

入酒五壺蒸飲○治一切諸風用清風藤出太平菰港

上者三四月采之不拘多少入釜內微火熬七日夜成

膏收入磁器內用時先備木梳三五把量人虛實以酒

服三茶匙將患人身上拍一掌其後遍身發癢不可當

以梳梳之。要癢止。卽飲涼水一口。便解。風病皆愈也。須  
避風數日良。

百稜藤。味氣缺。又名百靈藤。

蘇氏曰。百稜藤。生台州屬縣山中。春生苗。蔓延樹木上。無花葉。冬采皮用。土人常用之。

○百稜藤治一切風痺。風痛。風癰。風癩之藥也。煎膏。釀酒。作丸散。均可修用。

○集方治一切風痺疼痛不拘久近。用百稜藤五觔。水四斗。煎一斗。濾汁。再煎至三升。入牛膝。童便。製附子。天麻。鹿角膠。各二兩。俱作末。同煎。再入煉熟白蜜半升。熬如餛飩狀。磁瓶收之。每早晚各食前服三錢。白湯溫酒下。忌一切毒物。○治頭風腦痛。用百稜藤十觔。水一石。煎汁三斗。入糯米三斗。作飯。候冷。拌麴末九兩。同入缸中。如常釀酒法。經三五日。待熟澄清。每溫飲一小盞。服後渾

身汗出爲効。○治大風癩瘡癘疾。用百稜藤一觔。水二斗。煮數百沸。去渣。入粳米三合。煮米熟。取出米粒。密室中乘熱浴之。少臥取汗。汗後皮膚起如麤片。其漿渣隔日再作。連作十餘次。漸愈。

千里及味苦氣寒有小毒。又名千里光。

蘇氏曰：千里及，藤生，天台、山中也。及，杭越山谷道旁，附樹木籬落間。今宣湖間亦有之。春生苗葉細而厚，秋作花淺黃色。土人采花葉入藥用。蘇氏曰：又筠州有千里光，生山谷路旁，葉似菊而長，背有毛，枝幹圓而密。春生苗秋作花黃色，不結實。采莖葉入藥用，名黃花，一名益一物也。

○千里及解疫熱清痘瘡之藥也。主南北疫氣黃疸瘡。

赤白痢疾并解蠱毒。煮汁取吐下。諸證即平。又搗爛敷

百蟲及毒蛇惡犬咬傷。此藥寒平清利，雖無補益。治一

切熱毒諸疾咸需用之。但獨行單用不入衆藥共劑也。

○集方治天行疫熱瘴癘黃疸熱瘡熱痢時疾。用千里及

一握水煎飲立効。○治百蟲咬傷并毒蛇惡犬咬傷。用

千里及新鮮者搗敷其毒即解。○治爛弦風眼。用新鮮

本草彙言 入卷七 千里及 三

千里及以笋殼葉包火煨熟滴入目中。

藤黃味酸澇有毒。莖名游藤。

郭氏云。藤黃出岳鄂等州。諸山厓。係海藤花莖散落山石上。彼人收之。謂之沙黃。就樹采者。輕妙。謂之臘黃。李氏曰。今畫家漆匠所用藤黃。皆經煎煉成者。碾之麻在。又按南臘云。國有藤黃。乃藤之脂。番人以刀斫藤枝滴下地。數月後收之。似吳郭氏說微不同。不知卽一物否也。

藤黃治艸牙蛀齒水調點之卽落也。李珣

再附錄諸藤拾遺陳氏方

地龍藤味甘氣平無毒生天目山繞樹蟠屈如龍故名采即晒乾用吳中亦有而小異

主風證血羸弱腰膝脚中諸冷飲食不調不作肌膚浸

酒蒸服之已下草藤一種俱出陳氏藏器本草

龍手藤味甘氣溫無毒出安荔浦石上向陽者葉如龍手采無時晒乾用

主偏風口喎手足癱瘓風痺諸證兼能補虛益陽去冷

氣以醇酒浸蒸空心隨量飲

牛領藤味甘氣溫無毒生嶺南高山形潤如牛領取之晒乾用

主腹中諸冷證腰膝痛軟無力小便稠白如膏淋男婦

陽道衰乏立起水煮飲或浸酒蒸服。

牛蒡藤味甘氣溫無毒。

生深山大谷中大如樹牛好食之故名。

其藤有粉采得研細可收荒令人止饑其根食之令人髮落。

鬼膊藤味苦氣溫無毒。

生江南林間邊葉如梨葉子如鴉子

主去風活血宜浸酒蒸服其葉搗爛敷癰腫尤良。

斑珠藤味

氣溫無毒。

生深山中冬月不凋葉上如珠而毒

主風血羸瘦婦人諸疾。

息王藤味苦氣溫無毒

生嶺南山谷其葉冬月不凋

主產後腹痛惡露不盡取尺餘煎汁服

百丈青味苦氣平無毒

生江南林澤間藤蔓緊硬葉如薯蕷對生

主天行瘧疫溫熱疫毒煎汁服生搗汁亦可其根性

冷服之令人下利

溫藤味甘氣溫無毒

生江南山谷着樹不凋

主積風積冷有傷血分宜浸酒蒸飲

本草綱目

卷七

息王藤

百丈青

溫藤

鹽藤

七

藍藤味辛。氣溫。無毒。生新羅國。根如細辛。

主冷氣。欬嗽。濃煎汁飲。

瓜藤味甘。氣寒。無毒。生施州。四時有葉。無花。采皮無時。焙乾用。

主諸熱毒惡瘡。搗細末。用甘草湯調搽。蘇頌

合春藤味氣。無毒。生台州。其苗延木而冬夏常青。采葉用。

治諸腫風證極効。蘇頌

草部 石葶類

石斛味甘淡微瀼氣平無毒氣薄味厚陰中之陽降也入足太陰少陰二經

別錄曰石斛生六安山谷水傍石上蘇氏曰今荆襄漢中江左廬州台州溫州諸處亦有近以溫台者為貴謂其形似金釵之股端美可觀然氣味腐濁不若蜀產者氣味清疎形頗精潔更佳也蜀人呼為金釵花今克貢者取川地者進之又按李氏曰叢生水旁石上其根糾結甚繁乾則白軟莖葉皆青脆乾則黃靱五月生苗似竹節間出碎小葉七月間淡紅色花初冬結實節傍自生根鬚折之懸掛屋下時灌以水經年不死此即蜀中所產入藥最良再按蘇氏曰一種麥斛形似大麥累累相連頭生一葉而性多寒一種雀斛莖大如雀股葉在莖頭一種草斛若茅草長三四寸柔且靱折之如肉而實一種木斛中虛如木長尺餘色深黃而光澤悞用損人元氣修治去根頭酒潤蒸之晒乾用惟入湯膏不入丸散以質性綿韌不能作末故也○倪朱謨曰石斛短而中實木斛長而中虛甚易分別

○石斛壯筋骨健脚膝之藥也不藉水土緣石而生色黃  
味澁叢生盤結亦若筋膜之聚絡骨節也故前古稱其  
功用能壯筋骨健脚膝厚腸胃主傷中疲弱五藏虛損  
肉絕不足肌肉羸瘦諸證咸宜用之皆取此清虛純潔  
之質不與糞土卑污穢腐滋生之物比也又馬氏方有  
久服却病延年定志安神開胃進食以其有益脾胃益  
心腎之功力也凡物之受而量滿成觥滿而溢故虛勞  
可補羸瘦可充筋骨脚膝可健附生於石故命名以此  
○集方治五痿五痺足膝軟弱腰脊痠疼或遺精夢泄淋  
瀝成濁或三消五隔胃敗髓枯或脾元內損無故羸瘦  
或血冷精寒子嗣勿育或半產漏下血氣妄行或脾胃

不和飲食減少。或多食作脹。少食卽饑。○治五癆五痺。腰膝痠軟。用川石斛大草薢。枸杞。牛膝。天麻。白朮。當歸身。各五錢。黃柏七錢。作散服。空心服五錢。白湯調送。○治遺精夢泄。澀濁成淋。用石斛遠志。茯苓。車前。木通。滑石。甘草。黃柏。澤瀉。各二錢。牡蠣煨三錢。海金沙五錢。作散。子空心服三錢。白湯調送。○治三消病。好飲湯水。終日不輟。爲上消。好食米麵肥甘菓食等類。愈食愈瘦。爲中消。煩渴引飲。索水湯不厭。所下小便混濁如膏。爲下消。以川石斛。川黃連。知母。各等分。配入六味地黃丸料。作丸。早晚食前後皆可服五錢。白湯送。○治五膈五噎證。用川石斛一味。熬膏。加鹿角膠少許。收之。白滾湯化服。

十餘匙。此證多死間有生者。不過百中一二而已。○治  
脾元內損。無故羸瘦。用川石斛十兩。白朮茯苓半夏當  
歸砂仁廣皮人參黃耆各一兩。甘草五錢。熬膏。煉蜜四  
兩。和鹿角膠二兩。溶化收之。每早午晚各服十餘匙。白  
湯調送。○治男婦血冷精寒。子嗣勿育。或半產漏下。血  
氣妄行。用川石斛兔絲子各十兩。黃耆白朮川草薢枸  
杞子當歸身川芎補骨脂山藥肉桂木香人參各四兩。  
熬膏。以龜板膠鹿角膠各四兩。藥汁內溶化。收之。量加  
煉蜜數兩。亦可。每早晚白湯調服十餘匙。婦人服此加  
香附四兩。○治脾胃不和。飲食減進。或多食作脹。少食  
卽饑。用川石斛四兩。人參黃耆白朮茯苓半夏陳皮各

一兩甘草。川黃連。薑炒。白茯苓。各五錢。砂仁。麥芽。各二兩。爲末。作散子。每服三錢。白湯下。

地錦。味辛。氣平。無毒。

又名血見愁

又名草血竭

李氏曰。地錦。生近道田野。及荒寺階砌間。皆有之。就地而生。赤莖綠葉。六月開黃花。秋結黑實。而細狀如沙。疾藜。斷莖有汁。

○地錦。涼血。散血。解毒。止痢之藥也。并口九善通流血脉。專消解

毒瘡。別錄方。治婦人血結陰疝。及血痢。血崩。瀝湖方。消

癰腫惡瘡。血痢。熱癰諸疾。凡血病而因熱所使者。用之

合宜。設非血熱爲病。而胃氣薄弱者。又當斟酌行之。

○集方。治婦人血結腹痛。陰疝。熱瘕諸疾。用地錦草。搗汁。

○一<sup>升</sup>碗和熱酒飲之。○治<sup>血熱</sup>成痢腹痛。用地錦草搗汁  
一<sup>升</sup>碗和熱酒飲之。○治<sup>血熱</sup>赤白。用地錦草晒乾爲末  
每服二錢米飲下立止。○治<sup>血熱</sup>崩中。用地錦草搗汁  
二碗當歸川芎各五錢薑炭三錢將地錦汁二碗煎減  
半服。○治<sup>癰腫</sup>惡毒及背瘍。用地錦草一兩酸漿草五  
錢當歸三錢乳香沒藥各一錢酒水各一碗煎半服如  
有<sup>生鮮者</sup>搗汁熱飲以渣敷之効。○治<sup>好酒</sup>食炙<sup>林</sup>燂<sup>林</sup>之  
人<sup>遍身</sup>乾疥搔之血出<sup>死氏方</sup>燥癢不休以地錦草一大把搗  
汁和熱酒飲之。○治<sup>跌撲</sup>損傷<sup>死氏方</sup>內血瘀留作痛或金瘡  
血出不止俱用地錦草搗爛炒熱敷上以布縛緊一時  
許痛定血止。

骨碎補。味苦。氣溫。無毒。足少陰經之藥也。

陳氏曰。骨碎補原名猴薑。因其主折傷補骨碎有效。故命此名。生嶺南虔吉州。蘇氏曰。今淮浙陝西。夔路州郡皆有寄生石生。或木上。多在背陰處。引根成條。上有黃白赤毛。及短葉附之。又抽大葉成枝。葉長有缺。頗似貫衆。面色青綠。有青黃點。背色青白。有紫赤點。每一大葉兩旁各有小葉。又丫兩兩相對。至春作葉。冬則乾黃。無花實。根扁而長。畧似薑形。又江右人呼為胡孫薑。口華子呼為石毛薑。皆形相似也。修治用刀刮去黃赤皮。細切晒乾用。

○骨碎補。破血止血。療折傷。補骨碎之藥也。按此藥好生

陰處。每得陰氣為多。宜其入足少陰腎經。而主骨間病也。蘇氏方。治婦人血分阻滯。因虛而不堪行藥者。用此行散瘀積。補續折傷。一切筋骨血病。又甄氏方。主骨中邪氣。風血兩痺。以致手足不收。或大病後。四肢痿軟。無

方雷氏方治耳鳴耳聾虛氣攻牙牙痛動搖諸證咸靈治之皆入腎入骨之驗也但性燥氣溫如血虛風燥血虛有火血虛癰痺者俱禁用之如不得已在所當用者宜配大滋養同劑方可

盧不遠先生曰味苦走骨氣溫煖腎有火疾者恐生熨懷

○集方治打撲傷損骨節筋脉或腫或痛或傷折或閃肭用骨碎補三兩當歸川芎川續斷紅花俱酒洗炒桃仁泥各一兩五錢分作十劑水煎服或作丸梧桐子大每早晚吞服三錢白湯送亦可○治婦人血氣阻滯攻痛心腹或流散四肢成腫成脹腹猶疼痛血不行者用骨

碎補三錢、當歸、川芎、木香、玄胡、香附各二錢，俱酒炒。水煎服。○治骨中邪氣、或風、或火、或濕、或血、或痰、飲諸病。留滯作疼作脹，難以言狀者，用骨碎補三錢，羌活、防風、黃柏、蒼朮、當歸、川芎、懷生地、半夏天麻各二錢，俱酒洗炒燥爲末，每用三錢，白湯調服。○治久痢、久瀉不止，形容憔悴，腿足痿軟，無力者，用骨碎補二兩，川草薢一兩，於白朮、茯苓、枸杞子各八錢，俱用酒洗晒乾炒燥爲末，或作散，或作丸，每食前服三錢，白湯送。○治腎虛耳鳴耳聾，并齒牙浮動，疼痛難忍，用骨碎補四兩，懷熟地、山茱萸、山藥、茯苓各二兩，牡丹皮一兩五錢，俱酒洗炒，澤瀉八錢，鹽水炒，共爲末，煉蜜丸，每服五錢，食前白湯送。

下。○治一切牙痛用骨碎補四兩炒黑爲末每早擦牙  
不惟堅齒亦且補腎益精并除一切骨病如牙動將落  
者數擦立住再不復動極驗○治病後髮落不住用骨  
碎補野薺薇嫩枝各少許煎汁刷之○治腸風失血不  
止用骨碎補四兩炒黑如炭爲細末每早服三錢米湯  
調服○昔魏刺史患久泄諸醫不効竟至危始一醫用  
骨碎補爲末入豬腎中煨熟食之頓止蓋腎主大小二  
便久泄屬腎虛不可專從脾胃也特附此以廣其義云

石韋味苦。氣溫無毒。足太陽膀胱經藥也。

別錄曰石韋生華陰山谷蘇氏曰今晉終潞潞福州江寧吳越凡陰崖陰隙處處有之叢生石旁不聞人聲處更良李氏曰凌冬不凋葉長近尺濶寸許背有黃毛柔嫩斑點如文一種葉背有金星者名金星石韋葉如杏葉者名杏葉石韋同生石上功用亦相同也修治去黃毛極淨否則戟人肺令欬逆難療也外有古瓦屋上生者名瓦韋療淋亦効。

○石韋利水道通癰閉之藥也。日華子主小便癰閉不通。

或淋瀝遺溺凡膀胱一切火鬱氣閉之證用此立清故前古又謂清肺氣主勞熱下欬逆即與治膀胱火鬱氣閉之證同意但其氣性溫平無毒不補不瀉為方科要藥倘不善製去毛未淨增人欬嗽司業者當留心毋忽也。

○集方治小便淋痛用石韋去毛淨滑石各等分爲末每服二三錢白湯送最驗○治小便轉睪用石韋去毛淨車前子各二錢甘草五分水煎服○治男婦血淋用石韋去毛爲末茄子枝煎湯下二錢○治血崩漏用石韋去毛爲末每服三錢溫酒服極效

金星草

又名金星石韋味苦氣寒無毒

劉氏曰金星石韋生成出處與石韋同落生背陰石上及竹筍中或大木下及古瓦屋上少日色背陰處常有之萌出深綠色葉長尺餘至深冬背生黃星點子兩兩相對無花實凌冬不凋其根盤屈如菖蒲根而細折之有鱗五六月和根采之置乾用

○金星石韋其主治功用與石韋同然性至冷解鬱熱背發癰瘍及金石烟火丹藥諸毒發病特異悉以末白湯

調服立下。不惟丹石火藥之毒悉去。卽終身有患諸火病。一併盡除也。如年老人不可輒服。若患人不因金石烟火丹藥之毒。而因憂鬱氣血凝滯而發毒者。亦非所宜也。○其根搗爛。浸麻油塗頭。大生毛髮。○治熱毒下血。用金星草陳乾薑各三兩。俱微炒。共爲末。每服一錢。白湯調下。○治脚腫爛瘡。用金星草背。上星刮下。搗爛敷之。卽乾。

石莧味辛苦。氣平。有微毒。

蘇氏曰。石莧多生角州。附河岸沙石上生之。春生苗葉莖青。高一尺。葉如水柳而短。八九月采之。

○石莧善吐風涎之藥也。蘇氏方同甘草等分煎服。治船屢効。

虎耳草，味苦辛，氣寒，有少毒。

李氏曰：虎耳草，生陰濕處，亦栽于石縫間，莖高五六寸，有細毛，一莖一葉，如荷葉狀，人亦呼為石荷葉，葉大

如錢狀，又似初生小葵葉，如虎之耳形，夏開小花，淡紅色。

○虎耳草，解癰疫，吐蠱毒之藥也。宜生取搗汁，溫飲之，能

作吐利。如煎湯冷飲之，又能止吐利。故治暑月熱沙霍

亂者，煎湯冷飲之，立止。又治痔瘡腫痛，陰乾燒烟，桶中

熏之，立收。蓋寒涼能散，能利之物，有損胃氣，除此數證

之外，無他用。

平無毒

別錄曰。景天草。又名火丹草。出太山山谷。極易種植。折步置土中。澆溉旬日。便生也。今南北處處皆有。多生石上。今人家種于中庭。或種盆中。置屋簷上。云可辟火。春生苗。高一二尺。莖黃赤色。質極柔弱。折之有汁出。葉似長匙。淡綠色。光澤柔厚。起層而上。夏開碎花。紅白色。結實如連翹。而小。中有細黑子。如粟粒。秋後莖枯。明春宿根再發。

○火丹草解小兒赤遊丹毒消風疹熱瘡之藥也。別錄方。

解熱毒一切血熱諸病。鮑氏方。定傷寒熱狂。時行赤眼。頭痛小兒血熱驚風等證。但苦寒純陰。苟非實熱火邪。勿得輕用。以動脾氣。惟外塗無碍耳。

○集方治熱毒丹瘡并烟火丹毒。金粉諸毒。毒從兩股兩脇起。赤如火。用火丹草搗汁。和生酒減半飲之。或用渣

塗患上。○治蠱毒內攻不能吐出。用火丹草搗汁飲之。  
○治傷寒熱極狂亂。用火丹草搗汁飲之。○治天行時  
熱眼赤頭痛。用火丹草搗汁。日點三五次。○治小兒驚  
風煩熱。并遍身風疹。極癢諸瘡。或風疹隱現。皮膚不出。  
用火丹草煎湯浴之。

石胡荽味辛氣溫無毒其性雄烈升也陽也

李氏曰石胡荽南北諸處皆生。生石縫間及陰濕地。小  
草也。高一二寸。冬月生苗。細莖小葉。其狀宛如嫩胡荽。  
其氣辛薰。人不堪食。鴉亦不食之。夏開細花。黃色。結細  
子。極易繁衍。僻地生此。常鋪滿地而也。又一種小草狀  
類石胡荽。又名天胡荽。生近水渠  
中濕處。又名雞腸草。亦卽此草也。

○石胡荽利九竅通鼻氣之藥也。其味辛烈其氣辛薰其  
性升散能通肺經上達頭腦故孟氏方主胸脇痰喘氣  
閉不通鼻塞鼻痔脹悶不利又去目中翳障并頭中寒  
邪頭風腦痛諸疾皆取辛升溫散之功也。如開鍋蓋法  
常欲邪毒不閉令有出路然氣雄而烈力小而銳宜啗  
氣以聚其力故目病暴赤時眼翳膜障得取此塞鼻啗  
其氣卽愈亦仙方也。



隔紙膏。量瘡大小攤貼。先以溫茶洗淨瘡。縛上膏藥。卽有黃水出。五六日漸愈。○治脾寒瘧疾。用石胡荽一把。杵汁半盞。入熱酒半盞。和服甚効。

離鬲草。味辛。氣寒。小毒。

陳氏曰。離鬲草。生人家墻庭濕處。高二三寸。苗葉似菴蒲。江東有之。北土無也。

○離鬲草。吐痰飲。截瘵瘧之藥也。故陳氏藏器方。治小兒無辜寒熱。大腹痞滿。又散膈上痰飲。生搗汁。飲一合。當吐出宿物。立愈。又搗爛。敷痰癰結核。疔塊諸疾。此瞑眩之藥。

酸漿草味酸氣寒無毒

蘇氏曰酸漿草生南中道旁陰濕地及人家園圃中多有之北地亦有苗高一二寸叢生布地極易繁衍葉如浮萍一枝三葉一葉兩片至晚自合帖服如一四月間小黃花結小莢長一二分內有細子冬亦不凋初生嫩苗小兒喜食用指瑜石銅器自燒如銀

○酸漿草解毒涼血之藥也唐本草治男婦大小諸熱淋

澀澀瀝不通及大便秘塞或痔瘡脹痛或肛脫不收或

天行煩熱燥渴諸疾凡屬血熱咸宜用之但酸寒清利

只宜熱閉不通如屬胃虛自當遜避

○集方治小便氣血砂膏勞五種淋證用酸漿草一把和

四苓散煎服即愈○治諸淋澀痛用酸漿草洗淨為白

然汁一碗和生白酒頓熱一碗空心飲立通○治二便

不通用酸漿草。車前草各一大把。和砂糖一錢。調服。立  
通。未通再服。○治痔瘡出血疼痛。用酸漿草一大把。水  
二升。煎半升服。日三次。立效。○治大腸熱極。肛脫不收。  
用酸漿草一大把。甘草五錢。水二升。煎半升。徐徐服。○  
治天行時熱方煩燥作渴。真熱極者。用酸漿草一大把。水  
二升。煎減半。飲之。○治癰瘡作癢。用酸漿草搗揉擦之。  
數次愈。○治牙齒腫痛。用酸漿草一兩。洗淨。川椒五十  
粒。去目。爲末。同搗爛。取豆大。着痛處。卽止。

草部 苔草類

陟釐味甘氣寒平無毒

蘇氏曰王季拾遺記云晉武帝賜張華陟釐紙乃水中粗苔爲之青綠色名苔紙青滿也又水中石上生者綠色如毛詩人命名石髮是也別錄云陟釐生江南池澤間水中石上一種浮水中不生石上者名水苔性極冷與陟釐少異陟釐今晒乾之治爲苔脯又以糖鹽醃作食尤美水中青苔洗淨曝乾亦可作脯食二者皆利人汴京市中甚多外又有生井中者名井苔生老屋上者名屋游生石牆側者名垣衣生土牆頭者名土馬鬣生船底者名船苔生山石上者名昔邪生水冲石上者卽陟釐是也

○陟釐止渴止痢之藥也生水中石上甘寒而潔善治暑

熱之邪傷氣血者爲煩渴而燥爲穢痢而瀉并積熱犯胃痢疾脹悶不食者每需用此屢奏功效倘屬胃家虛寒切勿沾口

○集方治以上諸病用陟釐取新鮮者搗汁和白湯飲如無新鮮取乾者煎汁飲亦可。

海苔菜。味鹹。氣寒。有小毒。

鮑氏曰。海苔菜。生海岸。厓畔。長尺餘。破人乾之。爲脯。但味鹹。與醋煎水。苔味淡。不同也。

○海苔菜。化瘦瘤。結核。消酒積。解丹石藥毒之藥也。味鹹。得水氣而成。凡風火。烟石。丹藥。諸毒。用此立解。茶積。酒積。蘊結。內藏。以致面黃。腹痛。投此卽平。但氣雖寒平。性稍有毒。緣水氣醱結故也。如多食。亦令發瘡疥。使人面色痿黃。少血色。又飲病作嗽之人。亦忌用。納樹孔中。殺盡。

○集方。治以上諸病。用海苔菜。取新鮮者。搗汁。和白湯飲。如無新鮮。取乾者。煎汁亦可。切細和粥食。亦可充蔬。

石薺味甘澆氣寒無毒

陳氏曰石薺生太山石上如花薺別錄方雖載其言功用不言形狀此生高山石上今人謂之蒙頂茶多生克州蒙山石上乃山霧日影熏蒸日久結成早春青翠鋪開葉如手掌蓋背衣類也春中利取曝乾饒人謂之石雲茶其狀白色輕薄如花薺其氣香如薺其味甘齋如茗不可煎飲止宜咀嚙及泡湯吸清涼有味

○石薺解熱化痰生津潤喉之藥也此得山霧陰清之氣以生輕浮高潔能去心熱煩悶不安肝熱眼障失明脾熱唇口瘡發肺熱咽燥痰結腎熱小便淋閉凡諸虛火火鬱之證咸宜用之見蘇齋本草

○集方治心熱煩悶用石薺花五錢以蓮子十五粒煎湯泡服○治肝熱眼目昏障用石薺花三錢以木賊薄荷各二錢煎湯泡服○治脾熱口瘡用石薺花三錢以川

黃連六分煎湯泡服。○治肺熱咽燥有痰用石薺花三錢以麥冬去心黃芩各三錢煎湯泡服。○治腎熱小便淋閉及濕熱五疸諸疾用石薺花五錢以車前子木通各三錢煎湯泡服。

井中苔及萍藍味甘微甘氣寒無毒

陶隱居曰井中苔及萍藍係古廢井中苔  
萍及井中磚石上縫間生雜草俱類此

○井中苔萍藍雜草解漆毒熱疹之藥也清陰寒潔善除  
一切火病并解野葛巴豆諸毒搗爛調水飲之

船底苔味甘氣冷無毒

李氏曰船底苔係木之精氣浸漬船板木中久則變為  
青濕漸長苔草蓋因太陽日氣下照水中陰陽之氣蒸  
漬木中而成

○船底苔止鼻衄通血淋化金石藥毒之藥也

○集方治以上諸疾俱取雞子大一團水煮飲之

本草綱目卷之六井中苔船底苔

地衣草。味苦。氣寒。微有毒。

大氏曰。地衣草係陰濕地。日  
晒即起苔蘚如草狀者是也。

○地衣草解火毒丹毒之藥也。主身面丹腫。中惡心痛。以  
男入身上汗垢為丸。服七粒。白湯送立解。

垣衣。味酸。氣寒。無毒。

李氏曰。垣衣乃磚牆賊垣上背陰處青苔衣也。生石上  
者名昔邪。生屋上者名屋遊。形狀相似。治療畧同。上方  
不曾  
用此。

○垣衣療黃疸。止衄血之藥也。別錄方主熱極疸黃暴風  
口噤衄血吐血俱宜搗汁和酒飲之即愈。

本草彙言

八卷七

地衣草  
屋遊

垣衣

罕

屋遊味甘氣寒無毒。

別錄曰屋遊生古屋上陰處苔衣也八九月剝取用之其長數寸者非屋遊卽爲瓦松也。

○屋遊涼血止衄利氣通小便之藥也。開寶方主小兒積熱成癰痰閉煩悶煎湯飲之。李氏方治胃中風火牙齦宣露和鹽少許泡湯漱齒及鼻衄暴出小水卒秘俱宜新汲水研服此寒淡清肅之物多服亦損胃氣胃寒者少與之。

○集方治犬咬痛極取古屋上青苔屑按之立止。

昨葉何草味酸氣平無毒

即古屋上瓦松也

蘇氏曰昨葉何草處處有之生年久陰處瓦  
屋上如蓬勃生高丈餘遠望如松故名瓦松。

○昨葉何草涼血行血之藥也唐本草治胃熱酒積烟火

金石丹毒成血痢腸風者服之即止此涼血而止血也

又女子內熱血乾經絡不行服之即通此又涼血而行

血也然氣寒性利通行之用居多如血熱氣實酒食味

厚之人間有用之取効如老弱胃虛乏力之人不可泛

施

○集方治經血不通用古屋陰處瓦松活者五兩搗汁和

酒一碗入當歸梢紅花各一兩煎減半空心飲○治熱

毒酒積腸風血痢用瓦松八兩搗汁和酒一半入白芍

本草叢言

人卷七昨葉何草 土馬駿

聖

藥五錢炮薑末五錢煎減半空心飲。○治小便沙澀成淋不通用瓦松一觔濃煎湯乘熱熏洗小腹約兩三次卽通。

土馬驢味甘酸氣寒無毒。

劉氏曰土馬驢所在背陰古土牆之上歲多雨則茂盛或以爲垣衣非也垣衣生磚牆之側此生土牆之上比垣衣更長故名馬驢亦苔草之類也采之日乾用。

○土馬驢涼血止衄退熱壅骨蒸之藥也。

○集方治暴衄取土馬驢一二兩生酒煮滾溫服。○治骨蒸夜熱取土馬驢一兩納嫩雞中煮食漸退。

卷栢味辛氣溫無毒

別錄曰卷栢生當山山谷蘇氏曰今關陝及沂兗諸州亦有之叢生石上春分宿根再發高三五寸細葉似柳栢遇雨舒開如掌經臨卷東如拳根紫赤多鬚無花子六七月採取洗去沙土陰乾用

○卷栢行血通經之藥也前古主女人陰中寒熱癥瘕血閉絕子此屬陰不與陽功能使陰氣起而陽氣前通瘀滯行而新血生癥瘕去而寒熱解營衛融和子可發育矣然淡利之物活血通經卷栢之常性也苟非血有瘀蓄或不因瘀蓄而致疾者不可輕用

○集方治婦人血閉成瘕寒熱往來子嗣不育者用卷栢四兩當歸二兩俱酒浸炒白朮牡丹皮各二兩白芍藥一兩川芎五錢分作十劑水煎服或煉蜜爲丸每早服

四錢。白湯送。○治大腸下血。不拘年月遠近。用卷栢。側栢。棕櫚。各等分。俱火燒存性。爲末。每早食前服三錢。白湯調下。

外有地栢。卽卷栢之生于地上者。生蜀中山谷。根黃莖。細狀如絲。上有黃點子。無花葉。三月生長四五寸許。四月采。曝乾用。此藥治臟毒下血。與嫩黃耆各等分。爲末。米飲調。每服二錢。蜀醫甚神。此方特附此以廣用云。

馬勃味辛氣平無毒

寇氏曰馬勃生濕地及腐木上陶氏曰俗呼馬竄勃是也五六月卒然而發紫褐虛淺狀如狗肝大者如斗小者如拳如杓以指彈之即有塵出韓退之所謂牛溲馬勃俱收者是修治密室中置篋幘紙以生布張開緩後摩擦下以盤承取末用

○馬勃敷諸種惡瘡之藥也別錄方除浸淫馬疥瘰癧疽

瘡毒散頭面卒腫凡閭氏果亂眊蒙之眚結聚壅閉成癰者

假此輕浮勃然卒長之物旋放旋卷即旋開而卒旋聚矣他如寇氏方治喉痺重舌久嗽失音凍瘡破爛諸症亦取此勃然旋放冥然旋消之意

李蘋湖先生曰馬勃輕虛上焦肺經藥也故能治喉痺失音瘡疥諸疾所以東垣公治大頭瘰癧

不利有普濟消毒飲亦嘗用之。

○集方治馬<sup>凡</sup>疥<sup>毒</sup>用馬勃<sup>中</sup>擦粉菜油調敷○治癰疽<sup>疔</sup>疔

擦粉米醋調敷即消并入連翹各少許煎服亦可○

頭面卒腫并大頭瘋毒用馬勃五錢剪碎連翹荆

旁子薄荷白芷玄參羌活防風各三錢杏仁川芎各

錢水煎服○治急喉痺用馬勃擦粉五錢火硝一錢

為極細末每吹一字吐涎血即愈○治久嗽不止用

勃擦粉再研細煉蜜丸梧子大每服三十九白湯下

治積熱吐血用馬勃擦粉蜜湯調服一二錢○治

久不飲用馬勃粉敷之間日用葱湯洗一次

石松味苦辛。氣溫。無毒。又名玉扣

陳氏曰石松生天台山石上似松高一二尺山人取根莖用諸名山皆有之

○石松驅風活血之藥也拾遺方主脚膝冷疼及膚麻木一切風痺不仁之證宜一味浸酒飲之

桑花味苦。氣溫。無毒。

大氏曰桑花生桑樹上白薺花樣如錢用刀刮取炒用不是桑樹花也

○桑花瀝腸健脾止泄止血之藥也日華子治吐血衄血腸風藏血及婦人血淋白帶諸疾為末服二三錢良驗